

## KDN keluarkan nama individu disenarai hitam masuk negara

SAIFULLAH AHMAD | | 02 April 2022



Hamzah - Foto Bernama

LARUT - Kementerian Dalam Negeri (KDN) akan mengaktifkan senarai individu yang tidak dibenarkan masuk ke negara ini susulan pembukaan sempadan pada 1 April.

Menteri Dalam Negeri, Datuk Seri Hamzah Zainudin berkata, tindakan itu dibuat bagi memastikan tahap keselamatan negara berada pada tahap terbaik.

Menurutnya, agensi keselamatan juga telah bersedia sejak sebulan yang lalu dalam usaha memberi keutamaan terhadap keselamatan negara.

"Kita tak sebut dari negara mana tetapi ada senarai hitam yang sudah pun bersedia untuk memastikan bahawa mereka ini tidak dibenarkan masuk ke negara kita.

"Jadi kita siap-siaga untuk memastikan semua itu, supaya kita pertahankan bukan hanya maruah negara tetapi keselamatan rakyat dalam negara dan juga orang luar yang mahu masuk supaya berasa lega bahawa negara Malaysia ini merupakan negara selamat untuk mereka kunjungi," katanya kepada pemberita selepas menyempurnakan Majlis Penyampaian Sumbangan Masjid dan Surau Bagi Dewan Undangan Negeri (DUN) Batu Kurau, di sini pada Sabtu.

Mengenai langkah menangani aktiviti penyeludupan pula, Hamzah berkata, usaha tersebut dilakukan secara berterusan seperti mana pintu sempadan belum dibuka sebelum ini.

Menurut beliau, pihaknya menyedari kegiatan tersebut bukan hanya berlaku ketika sempadan negara dibuka sahaja.

"Mereka memang sentiasa mencari jalan untuk membawa masuk dan melakukan perkara yang tidak diingini. Contohnya masalah narkotik dadah, kita telah pun lihat sehari dua ini kita bekerja kuat untuk memastikan bahawa sesiapa sahaja yang cuba untuk membawa masuk dadah ke dalam negara akan kita pastikan mereka ini ditangkap dan bawa mereka ke mahkamah.

"Kita alu-alukan sesiapa sahaja masuk ke Malaysia tapi pada masa yang sama kita kena bersedia untuk memastikan bahawa bukan hanya dari segi keselamatan tetapi dari segi keperluan-keperluan mengikut prosedur operasi standard (SOP) yang diumumkan oleh Kementerian Kesihatan," katanya.

Ditanya mengenai persediaan menerima amah warga Indonesia yang telah ditandatangani perjanjian bersama republik itu, beliau menegaskan sebarang kemasukan warga asing ke negara ini masih perlu mengikut undang-undang ditetapkan.

Katanya, mana-mana individu yang menyalahi undang-undang di negara ini akan dikenakan tindakan termasuk warga tempatan sendiri.